


十駕齋養新錄

5 增 1
608
4



門 1 善 5
冊 608
卷 4

十駕齋養新錄卷第八

嘉定錢大昕

宋季恥議和

宋與金讐也義不當和而紹興君臣主和議甚力爲後世詬病厥後張浚韓侂胄志在恢復訖無成功及金人爲蒙古所困真西山奏請絕其歲幣嗣是金人索歲幣連歲犯邊以垂斃之金與宋決戰宋猶未能得志其國勢積弱可知矣然則從前之主和以時勢論之未爲失算也元與宋無讐入蔡之役孟珙會兵分金主函骨以歸稍雪靖康之恥是元且有德于宋矣論勢當和論理亦當和而全子才趙葵首倡收復三

京之議宰相鄭清之力主其說橫挑強敵兩京卒不可復而元兵分道來侵蜀土失其大半并襄陽亦棄之宋之失計誤國未有如清之者也史家以其召用真魏二儒諛之曰小元祐而絕不言其開邊蹙地之罪可謂信史乎賈似道援郢遣使蒙古請稱臣納幣乃得退師既而盡諱其事幽囚郝經等置和議于不問致蒙古興問罪之師其曲在宋不在蒙古也我弱彼強彼又先遣使而必不肯主和以速其亡蓋由道學諸儒恥言和議理度兩朝尊崇其學廟堂所習聞者迂濶之談而不知理勢之不可同日語也

四川宣撫

四川有宣撫司自張浚始本稱川陝宣撫司建炎三年浚以經略陝西駐軍秦州及富平之敗退屯閬中紹興三年浚召還以王似盧法原爲宣撫副使王象之云舊宣撫司率居綿閬之間四年以吳玠爲川陝宣撫副使置司河池又以趙鼎都督川陝荆襄軍馬不果行九年吳玠爲四川宣撫使玠尋卒以胡世將代之仍治河池十二年和議成移宣撫司于利州以鄭剛中爲使十七年剛中罷而以知成都府李璆爲四川制置使治成都自是不設宣撫司三十一年復以吳璘爲宣撫使判興州乾道三年四月吳璘卒以汪應辰主管宣撫司事移司利州六月以虞允文爲宣撫使五年召允文還以王炎代之移治興

元府八年虞允文再出爲宣撫使仍治興元淳熙元年允文
卒鄭聞代之聞召還以沈夏代之二年夏召還遂罷宣撫司
開禧用兵以程松爲宣撫使吳曦副之曦叛松遁還安丙爲
宣撫治利州丙卒仍省宣撫

四川制置

宋南渡後以四川爲上游重鎮蜀土富實無兵革之擾居官
者以爲樂土自開禧吳曦叛以西和階成鳳四州賂金安丙
誅曦之後并復四州及嘉定十年以後金人以絕歲幣屢犯
邊制置自成都移治利州尋又退守劔州時金方多事雖得
城邑仍不能守也寶慶三年蒙古滅西夏遂與宋爲鄰制置

鄭損棄三關遂失關外四州紹定四年元兵破興元出饒風
關制置桂如淵不能制然其時元人志在吞金假道東出初
不欲取宋州郡也端平元年孟珙會元兵滅金南北可以
和好宰相鄭清之妄啟邊釁稱兵汴洛敗績而返其明年元
兵大入取利州潼川兩路并破成都諸司退保夔門而蜀事
不可問矣其後彭大雅築重慶城爲蜀根本制置移治重慶
寶祐六年元兵大舉入蜀宋之疆土益蹙所存唯重慶合涪
瀘夔諸州而已今攷紹興以後任制置者先後歲月於左方
其所不知蓋闕如也

席益

紹興五年十月除四川安撫制置大使知成都府

胡世將

八年任制置使九年遷宣撫副使自是不設制置司

李璆

十七年七月除四川安撫使知成都府兼權四川宣撫司

曹筠

十八年五月除四川制置使罷宣撫司

蕭振

廿一年七月除四川制置使廿三年罷

符行中

廿三年五月除四川制置使

蕭振

廿四年除四川制置使廿六年再任四川制置使廿七年卒

李文會

廿七年除四川制置使廿八年卒

王剛中

廿八年九月除四川制置使

汪應辰

乾道三年四川制置使

晁公武

乾道四年三月除四川安撫制置使六年以與宣撫王炎不協罷制置司歸宣撫司

薛良朋

淳熙元年以四川安撫使兼制置使

范成大

淳熙元年十二月除四川制置使

胡元質

淳熙四年二月除四川安撫制置使七年罷

祿東之

淳熙七年以成都路提刑權制置使

陳峴

淳熙八年除四川制置使

雷正

淳熙十二年任知成都府制置使十二月以病去

趙汝愚

淳熙十二年十二月除知成都府

京鏜

紹熙三年四川制置使

邱密

紹熙三年四月除四川制置使

趙彥逾

紹熙五年十二月除四川制置使

程松 開禧元年六月除制置使二年三月進宣撫使治興元

楊輔 三年二月除制置使三月進宣撫使四月召

吳獵 三年四月除制置使尋召

安丙 三年三月除宣撫副使嘉定二年四月授制置大使罷

董居誼 七年三月自知成都府除制置使十一年自成都進

聶子述 十二年正月除制置使五月召

安丙 十二年五月再除宣撫使十四年十一月卒

崔與之 十四年十一月自知成都府除制置使十七年三月

鄭損 十七年三月自淮東帥除制置使寶慶三年棄三關遁

桂如淵 紹定元年自湖北帥除制置使

李 重 四年十月除制置使知成都府嘉熙元年進宣撫使

趙彥呐 四年十月除制置使知興元府

楊恢 嘉熙元年除制置使尋改參贊宣撫司

丁黼 元年制置使與元兵戰敗死見忠義王翊傳

孟琪 四年二月除宣撫使清祐元年二月改京湖制置大使

彭大雅 除制置使未詳年月或在孟琪之前

陳隆之 清祐元年制置使十一月元兵破成都死焉

余玠 二年六月除宣諭使十二月除四川安撫制置使兼知

余晦 重慶府寶祐元年六月召 元年六月除宣諭使八月除四川安撫制置使兼知重

李曾伯 慶府二年六月召 二年六月除四川宣撫使兼荆湖制置大使十月詔

蒲擇之

二年閏月暫充制置八月除制置副使兼宣撫判官

呂文德

四年三月除宣撫制置使兼知重慶府
開慶元年三月除制置副使十一月改京湖安撫制置使

俞興

制置使景定二年罷

劉雄飛

二年十一月除制置副使知重慶府四年三月除制置使

夏貴

五年四月除安撫制置使兼知重慶府咸淳四年十二月改沿江制置使

朱禩孫

咸淳六年二月除權兵部尚書仍四川制置使知重慶府據度宗紀有仍字是夏貴移鎮後即以禩孫代之矣八年二月除制置安撫大使十年改除京湖四川宣撫使兼知江陵府

張珏

德祐元年除制置副使二年除制置使

沿江制置

自開禧用兵而建康守臣遂有江淮制置之名厥後兩淮別

立制府而建康帥獨兼沿江制置使嘉定十二年嘗置制置

副使于鄂州尋省咸淳中又有制置副使治黃州未幾而國

亡矣

葉適

開禧二年七月除沿江制置使三年二月改江淮制置使七月召

徐誼

開禧三年九月除江淮制置使尋免兼

邱密

嘉定元年正月除江淮制置大使六月召

何澹

嘉定元年八月除江淮制置大使二年六月丁憂

黃度

嘉定三年正月除江淮制置使五年十月除權禮部尚書

劉榘

嘉定六年正月除江淮制置使八年七月除權工部尚書尋致仕

李大東

嘉定八年十一月除主管江淮制置司公事九年正月召

李珪 嘉定十年二月除江淮制置使十二年四月丁母憂

李大東 嘉定十二年九月再除沿江制置使十五年九月奉

余嶸 嘉定十五年十月除沿江制置使寶慶元年正月致仕

邱壽邁 寶慶元年正月暫權沿江制置事三年二月赴闕

趙善湘 寶慶三年二月除沿江制置使紹定三年改江淮制

李壽朋 紹定六年七月除沿江制置使十二月召

陳鞞 端平元年十月除沿江制置使嘉熙元年三月兼淮西

別之傑 嘉熙二年正月除沿江制置使三年三月兼督府參

西制置使二年正月除僉書樞密院事

杜杲 淳祐二年四月除沿江制置使四年三月除刑部尚書

董槐 淳祐四年四月除沿江制置使五年五月召

趙以夫 淳祐五年六月除沿江制置使七年四月移知平江

趙葵 淳祐七年六月以樞密使督視江淮京湖軍馬兼知建

康府九年二月進右丞相辭不拜

吳淵 淳祐九年二月除沿江制置使十二年移知福州

王埜 淳祐十二年二月除沿江制置使寶祐二年六月除禮

邱岳 寶祐二年八月除沿江制置使三年六月致仕

馬光祖 寶祐三年八月除沿江制置使六年二月改荆湖制

趙與憲 寶祐六年二月除沿江制置大使

馬光祖 開慶元年三月除沿江制置大使九月詔移司江州

姚希得 十一月仍同建康景定二年十月召

景定二年十月除沿江制置使五年三月召

馬光祖

景定五年三月再除沿江制置大使咸淳五年三月

吳革

咸淳五年三月除主管沿江制置司六年五月除制置

趙潛

咸淳九年四月除沿江制置使

汪立信

咸淳十年除沿江制置使兼江淮招討使尋卒

趙潛

德祐元年沿江制置使元兵至棄城遁

兩淮制置

開禧用兵嘗以鄧友龍宣撫兩淮未幾并江淮置一制置使

治建康嘉定十二年以後始有淮東制置治楚州王象之云

楚州今為淮東安撫司兼山東制置使後治揚州

賈涉

嘉定十二年九月除主管淮東制置司公事兼節制京

邱壽邁

暫權制司

許國

嘉定十六年十一月除淮東制置使寶慶元年兵亂

徐晞稷

寶慶元年除淮東制置使二年罷

劉璋

寶慶二年除淮東制置使是年被逐

姚翀

寶慶三年正月除淮東制置使

以上制置皆治楚州及姚翀敗以帥楊紹雲兼制置不復立闕改楚州為淮安軍尋又以淮東總領岳珂攝制置事

趙善湘

紹定三年自沿江制置使兼江淮制置大使

趙葵

紹定六年除淮東制置使知揚州端平元年改京河制

置使入洛師潰仍為淮東制置移司泗州端平三年復除淮東制置治揚州淳祐二年入知樞密院事

李曾伯

淳祐二年除淮東制置使

邱岳

淳祐六年除淮東制置使八年兼淮西制置

賈似道

淳祐十年三月除兩淮制置大使寶祐二年除同知樞密事仍舊任十一月除樞密使兩淮宣撫大使開慶元年除京湖四川宣撫大使

李庭芝

景定元年主管兩淮制置司公事咸淳五年正月除兩淮制置大使六年正月移京湖制置

印應雷

咸淳六年正月除兩淮制置使

李庭芝

咸淳九年十一月除淮東制置使德祐二年死難

淮西制置司或合於沿江或合於淮東紀志皆無明文今紀

其所知者

王象之云廬州今為淮西九郡帥府淮西制置使嘉定之制

楊恢

端平三年淮西制帥見齊東野語

陳韓

嘉熙元年以沿江制置使兼

杜杲

嘉熙二年九月除淮西制置使知廬州

史嵩之

嘉熙三年二月除淮西制置使知廬州

別之傑

淳祐元年以沿江制置使兼尋入執政

邱岳

淳祐八年以淮東制置使兼

賈似道

淳祐十年除兩淮制置大使

夏貴

咸淳九年十一月除淮西制置使德祐二年以城降元

京湖制置

南渡紹興初岳飛收復襄陽郢隨諸州始置湖北京西宣撫使治襄陽其後宣撫司罷而江陵襄陽守臣各帶安撫使隆

興初嘗置湖北京西制置使未幾罷開禧間復設宣撫尋罷而置荆湖制置於江陵嘉定間移治襄陽自是始定京湖制置之名

虞允文 隆興元年七月除湖北京西制置使二年七月召

韓仲通 二年除湖北京西制置使乾道元年六月罷制置司

薛叔似 開禧二年四月除京湖宣撫使十二月罷

吳獵 開禧二年十二月除京湖宣撫使

項安世 以湖廣總領權宣撫事

李大性 荆湖制置使知江陵府當攷年月

劉光祖 嘉定五年二月自襄陽帥為京湖制置見荆門州題名石刻

趙方 嘉定十年京湖制置使十四年七月進大使八月卒

陳咳 嘉定紹定間京湖制置使

史嵩之 紹定五年正月除京湖制置使知襄陽府端平元年罷

趙范 端平元年九月除京湖制置使三年以失襄陽奪官

史嵩之 嘉熙元年任三年正月拜右丞相仍督視諸路軍馬

孟琪 嘉熙二年除京湖制置副使尋除制置使三年兼知鄂

州四年除四川宣撫使兼知夔州仍兼京湖制置使淳

祐元年進大使兼夔路制置大使置司峽州四年兼知

江陵府六年九月卒

賈似道 淳祐六年九月除京湖制置使知江陵府九年三月進大使

李曾伯 淳祐十年三月除京湖制置使十一年十一月進大使

使寶祐二年兼四川宣撫使其京湖職事令呂文德

主之

吳淵 實祐三年三月除京湖制置大使

趙葵 實祐五年七月除京湖制置大使

馬光祖 實祐六年二月除京湖制置使十二月移司峽州

呂文德 開慶元年除京湖制置使兼知鄂州咸淳五年十二月卒

李庭芝 咸淳六年正月除京湖制置大使

汪立信 咸淳九年四月除京湖制置使知江陵府

朱禔孫 咸淳十年七月除京湖四川宣撫使知江陵府德祐元年四月降元

高達 咸淳十年十二月除湖北制置使德祐元年四月降元

京湖

宋初有荆湖南北路南渡以後中原盡失唯京西路之襄陽

府隨州棗陽光化信陽軍尚為宋土故有京湖路之稱蓋合

京西湖北為一路也棗陽本隨州屬縣南渡後升為軍而地

理志不載升軍事亦史之漏略

王象之云隨州舊領縣三日隨縣曰唐城曰棗陽紹興五年廢唐城為鎮隸隨縣嘉定十二年制置趙方奏陞棗陽為軍却割德安府應山縣來屬仍以棗陽之桐柏鎮隸隨縣却將隨縣便近鄉村撥換與棗陽軍對易

利州路分東西

王象之云自紹興十四年分利州為東西路乾道四年復合

為一淳熙二年復分三年復合五年復分紹熙五年復合慶

元二年復分嘉定三年復合嘉定戊寅以聶子述帥東路丁

燾帥西路而復分今復合矣初紹興十四年以秦鳳路階成

西和鳳屬利西路與文龍共七州後又益以天水軍爲八州
以沔州本名興州爲帥府以興元利閬隆慶巴蓬金洋大安九州
軍爲利東路以興元爲帥府此其大略也

利東西路分置安撫一治興元一治新沔即興州也後改沔州自鄭損

以制置使移司新沔金人入寇損倉皇回利州人情震懼高

崇言爲今日計宜循舊比以二帥分治梁沔守衛邊場制置

使還利端居堂奧委任責成庶幾緩急不致貽輕納侮譬諸

象奕大將不出宮不臨河也見魏了翁撰崇墓志蓋在紹定初

湖東湖西路

紹興元年詔分鄂岳潭衡永道郴桂陽八郡爲湖東路安撫

使置司于鄂州鼎澧辰沅靖合邵全武岡九郡爲湖西路安

撫司治鼎州

襄陽暫復

趙范失襄陽在端平三年二月卽元太宗之十年也而元紀
於是年冬始書襄陽府來附又攷魏了翁集有奏備別之傑
申到劉廷美等復襄事宜狀云襄陽府自二月二十一日軍
變以來因循不守遂爲北人所據又據諸處探報申北人在
城內起屋造酒以待僞酋及韃賊大隊前來度夏行府遂委
參謀官別之傑差信實幹事人賈榜劄告命前去結約土豪
已據劉廷美等收復樊城遂遵照便宜旨揮特與超轉修武

郎差充京西路鈐之傑遂遣使臣鄧雲等贖上件告命及開
諭軍民榜劄前去劉廷美軍前交付今據鄧雲等狀申江海
都統與廷美之弟廷輔商議稱督府有告劄發下樊城又參
謀司亦已調兵應援樊城廷輔遂即時將帶人馬錢物於四
月二日起離荆門取南漳縣老鴉山路招集官民兵鄉農間
道前去仍約廷美大軍會合夾擊叛賊水陸並進已行克復
襄陽城壁了當其城內見係劉廷美兄弟看守臣又得之傑
書稱江海聞報遂自荆門徑趨襄陽與劉廷美兄弟協力扞
禦云云其事不載宋史據了翁狀中雖云既失復得別無與
元兵攻戰之文是襄陽之陷止由軍將不和擁眾外叛而元

兵初未至故劉廷美等得乘虛入城耳及元兵至而紛紛投
附其地始爲元有元史繫之是年冬得其實矣

復襄樊年月不同

宋史理宗紀淳祐十一年十一月京湖制司表都統高達等
復襄樊按紀于端平三年失襄陽之後至此始書復襄樊而
元史太宗紀乃云戊戌即嘉熙二年歲襄陽別將劉義叛執游顯
等降宋宋兵復取襄樊孟珙傳亦云嘉熙三年正月劉全復
樊城遂復襄陽雖有一年之差然較之高達復襄樊相去至
十二三年意者嘉熙收復之後仍不能守至高達始有之乎
元大一統志端平丙申襄陽失守淳祐辛亥高達復襄亦不

載嘉熙收復事蓋自劉義隆宋以後元已棄襄而不有亦不立鎮戍至淳祐辛亥始復屯駐重兵於此非以兵力取之在宋雖有拓邊之勞在元未有失地之實也元史憲宗紀不載高達取襄樊蓋自戊戌以後襄樊已爲宋土矣又攷姚燧撰鄧州趙長官碑云乙未太子南征還令鄧均唐三州民徙雒陽西三縣明年丙申襄樊亦徙雒陽是丙申襄陽失守之時蒙古已徙其民于雒陽區區空城本不作雷戍計也

喫菜事魔

向讀沈繼祖劾朱文公疏有喫菜事魔之語不解所謂頃讀李心傳繫年要錄載紹興四年五月起居舍人王居正言伏見兩浙州縣有喫菜事魔之俗方臘以前法禁尚寬而事魔之俗猶未至于甚熾方臘之後法禁愈嚴而事魔之俗愈不

可勝禁州縣之吏平居坐視一切不問則已間有貪功或畏事者稍蹤跡之則一方之地流血積屍至于廬舍積聚山林雞犬之屬焚燒殺戮靡有孑遺自方臘之平至今十餘年間不幸而死者不知幾千萬人矣仰惟仁聖在上視民如傷而民愚無知蹈禍至死竊意陛下所宜惻然動心而思欲究其所以然之說也臣聞事魔者每鄉每邨有一二桀黠謂之魔頭盡錄其鄉邨姓氏名字相與詛盟爲魔之黨凡事魔者不肉食而一家有事同黨之人皆出力以相賑卹蓋不肉食則費省故易足同黨則相親相親故相卹而事易濟臣以爲此先王導其民使相親相友相助之意而甘淡薄務節儉有古

淳朴之風今民之師帥既不能以是爲政乃爲魔頭者竊取以瞽惑其黨使皆歸德於魔于是從而附益之以邪僻害教之說民愚無知謂吾從魔之言事魔之道而食易足事易濟也故以魔頭之說爲皆可信而爭趨歸之此所以法禁愈嚴而愈不可勝禁伏望陛下念民迷之日久下哀矜之詔書使人曉然知以爲不肉食則費省故易足同黨則相親相親故相卹而事易濟此自然之理非魔之力而至于邪僻害教如不祭其先之類則事魔之罪也部責監司郡縣責守令宣明詔旨許以自新又擇平昔言行爲鄉曲所信者家喻而戶曉之其間有能至誠用心率衆歸善者優加激賞以勵其徒庶

幾舊染之俗聞風丕變子子孫孫咸被聖澤實一方生靈赤子之幸詔諸路帥憲司措置毋得搔擾生事乃知喫茶事魔卽今人所謂邪教也

陸游條對狀自古盜賊之興若止因水旱饑饉迫於寒餓嘯聚攻劫則措置有方便可撫定必不能穴爲朝廷之憂唯是妖幻邪人平時誑惑良民結連素定待時而發則其爲害未易可測伏緣此色人處處皆有淮南謂之二禳子兩浙謂之牟尼教江東謂之四果江西謂之金剛禪福建謂之明教揭諦齋之類名號不一明教尤甚至有秀才吏人軍兵亦相傳習其神號曰明使又有肉佛骨佛血佛等號白衣烏帽所在

成社僞經妖像至于刻板流布以祭祖考為引鬼永絕血食以溺為法水用以沐浴其他妖濫未易槩舉更相結習有同膠漆萬一竊發可為寒心

吳潛建儲之謗

吳毅夫建儲之謗宋史言之不詳頃見周密癸辛雜識有一條云魏峻字叔高號方泉娶趙氏乃穆陵親姊四郡主也理宗第六福王第八庚午歲得男此庚午字誤若謂嘉定庚午則理宗尚未為皇子若謂咸淳庚午則度宗已即位小字關孫自幼育於紹興之甥館實慈憲全夫人之愛甥也慈憲每于禁中言其可喜且為求官穆陵以慈憲之故欲一見而官之遂俾召至皇城法凡異姓入宮門必懸牌于腰

乃可唯宗子則免此一時權宜遂令假名孟關以入見焉時度宗亦與之同入宮欲其故遂倡為魏太子之說既而外廷傳聞浸廣于是王伯大吳毅夫得其事遂形奏疏而四方遂有魏紫姚黃之傳其實則不然也關孫後溺死于榮邸瑤圃池中當吳毅夫為相日穆陵欲建儲吳不然之欲別立汗耶承宣口口方甫以通殷勤吳以罪去國紹陵既為皇子嘗遣人俟於汗耶欲殺之方知之乃自後門逃去後為謝堂捕之送兵馬司自刎而死此事福王親聞之穆陵云按汗耶當是漢邸之譌所云漢邸承宣其名亦無攷要皆出讒謗之口不足信也

遼史

天祚紀乾統元年初以楊割為生女直部節度使其俗呼為太師是歲楊割死傳於兄之子烏鴉束束死其弟阿骨打襲按楊割即金史之盈歌追謚穆宗者也據金史世紀以癸未歲卒即宋崇寧二年遼乾統三年也紀繫於乾統元年誤矣世紀康宗烏鴉束乾統五年癸未襲節度使五年當是三年之謬烏雅束以癸巳歲即世祖紀世紀作癸酉誤當遼天慶二年而遼紀失書遼金兩史同時刊修而不相檢照如此

壽隆年號誤

道宗初改元清寧次咸雍次太康次大安各十年次壽隆至

七年止此見於遼史者也按洪遵泉志引李季與東北諸蕃樞要云契丹主天祐年號壽昌又引北遼通書云天祚即位壽昌七年改元乾統量公邁歷代紀年遼道宗改元清寧咸雍太康大安壽昌東都事略附錄紹聖三年改元壽昌今刊本作壽昌文獻通攷洪基在位四十七年其紀元自咸熙改太康又改大安皆盡十年然後為壽昌至七年終予家所藏遼石刻作壽昌者多矣文字完好灼然可信且遼人謹於避諱道宗為聖宗之孫斷無取聖宗諱紀元之理此遼史之誤不可不改正

西遼紀年

西遼世次紀年唯見于遼史天祚紀末它書皆無之今當以
遼史爲正紀云大石以甲辰歲自立改元延慶卽宋宣和六
年在位二十年而殂則宋紹興十三年癸亥也其妻稱制號
感天太后當是紹興十四年甲子稱制七年而卒則宋紹興
二十年庚午也大石子夷列嗣位在紹興廿一年辛未立十
三年而殂則宋隆興元年癸未也其妹稱制號承天太后當
在宋隆興二年甲申稱制十四年而被殺則宋淳熙四年丁
酉也夷列子直魯古嗣位在宋淳熙五年戊戌立三十四年
而爲乃蠻所滅則宋嘉定四年辛未也遼史稱大石建號萬
里之外雖寡母弱子更繼迭承幾九十年以大石在位廿年

合之二后二主年數恰八十八年然則延慶當有十年併康
國十年乃合在位廿年之數唯遼史於延慶三年建都之後
卽云改延慶爲康國元年又云康國十年歿似大石在位止
十二年明人續綱目續通鑑者大率因此致誤會不一檢照
後文何也商氏續綱目薛氏王氏續通鑑所載歲月俱未足
信

遼史紀西遼之亾云直魯古在位三十四年時秋出獵乃蠻
主屈出律以伏兵八千擒之而據其位襲遼衣冠尊直魯古
爲太上皇朝夕問起居以侍終直魯古死遼絕初不言其年
何干支也諸家編年書皆系以辛酉當宋嘉泰元年不知何

據予謂欲知直魯古之亾當先究乃蠻之世系乃蠻與蒙古接壤數相攻擊其事跡畧見于元史初不與西遼為鄰也屈出律者太陽罕之子太陽罕以甲子歲為元太祖所殺丙寅元兵復征乃蠻擒太陽罕之兄卜魯欲罕而屈出律出奔也兒的石河上戊辰冬元再征屈出律奔契丹契丹即西遼戊辰在辛酉後八年其時西遼尚無恙則謂亾於辛酉者不可信一矣元史太祖四年己巳畏吾兒國來歸而巴而朮阿而忒的斤傳亦云臣于契丹歲己巳聞太祖興朔方遂殺契丹所置監國等官則己巳歲西遼尚存謂亾于辛酉者不可信二矣西遼與蒙古未交兵故元史不載直魯古之滅

然遼史所述三主兩后在位年數分明自甲辰至于國亾計八十八年其干支當為辛未非辛酉也辛未為元太祖之六年正在屈出律奔契丹之後若辛酉歲則屈出律之父尚在何由奪西遼而有之謂西遼亾于辛酉不可信三矣長春真人西游記記西遼事頗詳云自金師破遼大石林牙領眾數千走西北移徙十餘年方至此地傳國幾百年乃滿失國依大石謂大石之後即直魯古也士馬復振盜據其土既而算端西削其地天兵至乃滿尋滅算端亦亾其云乃滿即乃蠻也其云失國依大石即屈出律奔契丹事其云士馬復振盜據其土即謂直魯古被擒屈出律襲遼衣冠而據其位也長春西游親到

西遼舊都距西遼之亾僅十餘歲所言必得其實乃蠻失國
 在元太祖戊辰歲而直魯古之被擒又在其後則謂亾于辛
 酉不可信四矣聖武親征記屈出律以數人奔契丹王菊兒
 汗菊兒汗即直魯古也遼史大石以甲辰歲二月五日即位
 號葛兒汗子孫蓋世襲其號元史曷思麥里傳初為西遼濶
 兒汗近侍曰濶曰菊與葛音皆相近曷思麥里亦直魯古舊
 臣元太祖西征率屬迎降從大將哲伯為先鋒攻乃蠻克之
 斬其主曲出律即屈出律蓋為直魯古報讎其事當在太祖庚辰
 歲與戊辰屈出律奔契丹相去十有三年或據此文疑屈出
 律為元兵所斬無奔契丹事者非也知菊兒汗即直魯古則

直魯古之失國必在元太祖之世謂亾于辛酉不可信五矣
 諸家編年所以誤者由于不信大石在位有二十年而遼史
 本有似相矛盾之處既云以甲辰歲即位改元延慶矣又云
 延慶三年班師東歸馬行二十日得善地建都城號虎思斡
 耳朵改延慶為康國元年又云康國十年歿似大石祇有十
 二年與在位二十年之文不合既滅大石之年則直魯古之
 滅不得不移前數年矣今按西游記云大石領眾走西北移
 徙十餘年方至此地是大石建都之前稱尊號者已十餘年
 矣因建都而改元又十年而歿豈非在位二十年乎且大石
 之西奔在保大三年癸卯七月大石既自立為王必不承保

大之號次年甲辰二月改元延慶固其宜也史云明年二月甲午以青牛白馬祭天地祖宗整旅而西蓋卽改元之日旣而兵行萬里乃至尋思干城與忽兒珊大戰敗之駐軍尋思干凡九十日回回國王來降又西至起兒漫文武百官冊立爲帝距甲辰改元之時蓋已久矣改元在前稱帝在後遼史以改元稱帝爲一事固非其實諸家書移於乙巳亦出臆撰且自乙巳至辛酉不過七十七年與遼史更繼迭承幾九十年之語不相刺謬乎愚謂大石官爲林牙頗通今古其改元也假興復之名以號召諸部必不遽稱帝也延慶改元當在甲辰之春其時猶未至西域若稱帝則當于延慶三年蓋用

漢昭烈晉元帝故事俟天祚凶問至而後百官勸進耳若建都改元康國則必在延慶十一年西游記所謂移徙十餘年方至此地者如是大石卽位二十年本無可疑大石之年定而直魯古之必在辛未而不在辛酉亦決然可信遼史雖有乖舛而可信者猶大半諸家云云則臆決附和之談置之勿論可矣

萬斯同紀元彙攷云耶律大石延慶元年乙巳康國元年丁未大石妻咸清元年丙辰大石子夷列紹興元年壬戌夷列妹崇福元年甲戌夷列子直魯古天禧元年戊子其三十四年辛酉爲乃蠻所擒與續綱目諸書同遼史但云大石在位

二十年感天太后稱制七年夷列在位十三年承天太后稱制十四年據紀年表則康國之十年卽咸清之元年咸清之七年卽紹興之元年紹興之十三年卽崇福元年是三世皆未踰年而改元矣而于天禧元年書十二月承天后被殺夷列子直魯古立則是承天后稱制實十五年與遼史尤不合

金史衛紹王紀

衛紹王一朝記注亾失今見於紀者元中統三年王鶚所采撫然亦未可盡信如大安二年十二月辛酉朔日有食之卽宋嘉定三年宋史紀志是年六月丁巳朔日食初無十二月日食事紀不書六月之食而書於十二月己爲譌舛且以次

年正月乙酉朔推之此月朔斷非辛酉也元和李尚之疑此朔當在前一年然宋史是月亦不言日食

齊乘濟陽縣大定六年

大定當作泰和

避金主允濟諱改曰清陽允

濟遇弑復舊名孫慶瑜豐閏縣記云大定間改永濟務爲縣大安初避諱更名豐閏此二事皆在衛紹王朝想濟南府亦當更名而史失其傳矣

金史義例未當

金史酷吏止二人高閭山死于國事可掩其酷刑之咎則酷吏傳可不立也宣宗以後近侍頗干政事然金之近侍皆世家子弟爲之於宦者無預也宦者亦止二人梁琬可入佞幸

傳宋珪可附見奉御絳山傳則宦者傳亦可不立也張邦昌
王倫宋史有傳不當又入金史崔立當入叛臣傳不當儕于
列傳張僅言非叛黨不當附張覺傳

金人多二名

金人多二名一從本國名一取漢語史家不能悉載如元史
按竺邇傳所載金會州守將郭斌卽金史忠義傳之郭蝦蟆
也交聘表所載使宋賀正且生辰諸臣以宋史本紀證之往
往姓同名異金表多國語宋紀則其漢名也

地理志失載鞏昌府

完顏仲德傳正大六年移知鞏昌府兼行元帥府事鞏州升

鞏昌府地理志失書

一地異文

哀宗紀前書大元進兵嶢峯關後書九月中徵兵會于饒豐

關嶢峯饒豐卽一地也郭蝦蟆傳作饒風關與元史同完顏合達

傳作饒峯關

南遷錄

金人南遷錄題云著作郎張師顏撰陳直齋謂其歲月牴牾
不合今攷其所述年號事迹如云興慶二年十一月立皇太
孫四年正月世宗晏駕太孫登極逾月改元天統天統四年
十一月誅鄭王允蹈五年正月愛王據城叛泰和十四年七

夕章宗爲牛刀兒所弑頒遺詔立磁王允明爲皇太叔七月
八日磁王卽位十五日爲內侍趙元德等所弑大臣議濰王
允文世宗第六子次當立十八日濰王卽位謚磁王爲明宗
八月愛王自立謚其父鄭王爲明宗十一月愛王薨北國主
立其子雄爲三大王天定二年辛未四月策進士五年甲戌正月
八日上宴駕百官議淄王允德世宗第八子當立十日卽帝
位五月葬德宗于福寧陵以金史紀傳校之全不相應大約
南宋好事者妄作

十駕齋養新錄卷八

終

十駕齋養新錄卷第九

嘉定錢大昕

元史

元史纂修始於明洪武二年以二月丙寅開局八月癸酉告
成計一百八十八日其後續修順帝一朝於洪武三年二月
乙丑再開局七月丁未書成計一百四十三日綜前後厘三
百三十一日古今史成之速未有如元史者而文之陋劣亦
無如元史者蓋史爲傳信之書時日促迫則攷訂必不審有
草創而無討論雖班馬難以見長況宋王詞華之士徵辟諸
子皆起自艸澤迂腐而不諳掌故者乎開國功臣首稱四傑

而赤老温無傳尙主世胄不過數家而鄆國亦無傳承相見於表者五十有九人而立傳者不及其半太祖諸弟止傳其一諸子亦傳其一太宗以後皇子無一人立傳者本紀或一事而再書列傳或一人而兩傳宰相表或有姓無名諸王表或有封號無人名此義例之顯然者且紕繆若此固無暇論其文之工拙矣

元初世系

元史太祖紀述其先世自孛端叉兒始據祕史則孛端叉兒之前尙有十一世最初曰巴塔赤罕二世曰塔馬察三世曰豁里察兒蔑兒干四世曰阿兀站孛羅温五世曰撒里合察

兀六世曰也客你敦七世曰擗鎮八世曰合兒出九世曰

孛兒只吉歹蔑兒干今蒙古以博爾濟吉特爲貴族卽孛兒

只吉歹之轉也蔑兒干華言善射也十世曰脫羅豁勒真伯

顏十一世曰朵奔蔑兒干史作脫奔卽孛端叉兒之父也祕史

察又作宗室世系表云元之世系藏之金匱石室者甚祕外廷

莫能知也其在史官固特其槩而攷諸簡牘又未必盡得其

詳則因其所可知而闕其不知亦史氏法也史臣未見祕史

故於元初世系頗漏略

孛端叉兒之孫蔑年土敦卽紀表之哱麻篤敦也生七子其五人史闕其名今據祕史蔑年土敦生子七人曰哈出曲魯

克曰合臣曰合赤兀曰合出刺曰合赤温曰合闌歹曰納臣
把阿秃兒哈出曲魯克即史之既擊篤兒罕也有子曰海都
其母曰那莫倫史作莫罕倫是那莫倫為哈出曲魯之妻而史以
莫罕倫為咩麻篤敦妻其不合一也哈赤曲魯克有子海都
為世嫡其餘六人亦各有子孫別為族姓而史乃謂押刺伊
而部殺莫罕倫及其六子滅其家唯納真即納臣為贅婿故不
及難其不合二也祕史初不言與押刺伊而部爭戰之事本
紀疑未可信祕史屯必乃止一子世系表以為六子列葛不
律寒于第六似誤以茂年土敦之子為屯必乃
子
祕史海都生三子曰伯升豁兒多黑申史作拜姓忽兒曰察刺孩領

忽曰抄真幹兒帖該伯升豁兒多黑申生一子曰屯必乃薛
禪史作敦必乃屯必乃生三子長曰合必勒合罕史作葛不律寒合罕之
號自此始合必勒有子七人次子把兒壇把阿秃兒史作八里丹
即也速該之父也合必勒合罕歿遺言以從兄想昆必勒格
之子俺巴孩為合罕史作咸補海罕即察刺孩領忽之孫是為泰赤
烏氏俺巴孩與塔塔兒部結婚親自送女被執獻于金人
殺之部人立合必勒合罕之第四子曰忽圖刺合罕忽圖刺
歿而太祖繼稱成吉思合罕蓋在王罕未敗之日先稱合罕
者一部之長後稱皇帝則諸部之長矣

太祖紀

太祖紀十年木華黎攻北京金元帥寅荅虎烏古倫以城降

按東平王世家作烏古倫寅荅虎烏古倫者寅荅虎之氏非

兩人也史臣不辨姓名顛倒其文遂若別有一人史天祥傳作北京雷

守銀荅忽同知烏古倫

萬奴

太祖紀十年金宣撫蒲鮮萬奴據遼東僭稱天王十一年蒲

鮮萬奴降既而復叛僭稱東夏按東平王世家癸巳太宗五年王

與皇子貴由攻完顏萬奴于遼東平之完顏萬奴金內族也

自乙亥歲聚眾據東海號東夏至是凡十九年而滅此萬奴

之氏一以為蒲鮮一以為完顏未審孰是木華黎傳與世家同金史宣宗紀作

蒲鮮太宗紀但書平萬奴而不言皇子貴由國王塔思當據世家補之家補之

伐西夏事差一年

太祖紀十三年是年伐西夏圍其王城夏主遵頊出走西涼

此金興定二年宋嘉定十一年也陳桎通鑑續編薛應旂宋

元通鑑皆在前一年今按金宣宗紀興定二年正月陝西行

省獲歸國人言大元兵圍夏王城李遵頊命其子居守而出

走西涼夏與金相去遼遠而金人於是年正月已傳問知之

則必是前一年事元紀誤

李全事誤

二十年武仙以真定叛董俊判官李全亦以中山叛按金元之際有三李全一為益都行省即壇之父也一為冠氏元帥見趙天錫傳本名泉詳見後一見董俊傳云己卯權知中山府金將武仙據真定俊率眾夜入真定逐仙走之庚辰春金大發兵益仙治中李全叛中山應之庚辰者元太祖十五年也全之叛蓋在武仙未降元以前紀乃書於仙既降又叛之後失之甚矣

旭烈兀大王

旭烈兀大王睿宗第六子一作煦烈憲宗壬子歲受命討西域癸丑至木乃分國下其城百廿丙辰破乞都卜城丁巳破

兀里兒城乞石迷國來降得三百餘城又西至大房下其城百八十五戊午命將西渡海收富浪西南至石羅子賓鐵皆降之己未破兀林降其城百廿又西南至乞里灣降之西域平遣使告捷而憲宗崩遂畱鎮其地至元辨偽錄云今煦烈大王皇帝親弟鎮守西域在尋思干西南雪山之西使命往還來往不絕

靖遠王合贊者旭烈兀大王之孫至元二十七年封黃潛撰海運千戶楊君墓誌云君諱樞大德五年君年甫十九致用院俾以官本船浮海至西洋遇親王合贊所遣使臣那懷等如京師遂載之以來那懷等朝貢事畢請仍以君護送西還

丞相哈刺哈孫如其請奏授君海運副千戶佩金符與俱行以八年發京師十一年乃至其登陸處云忽魯模思云是役也君往來長風巨浪中歷五星霜凡舟楫糗糧物器之須一出于君不煩有司既又用私錢市其土物白馬黑犬琥珀蒲萄酒蕃鹽之屬以進按元史成宗紀大德八年七月諸王合贊遣使來貢珍物卽其事也地理志西北地附錄有云忽里模子者卽忽魯模思之轉也

罕勉力卽哈密

罕勉力卽今之哈密也亦曰哈迷里元典章延祐六年四月欽奉聖旨節該如今亦都護爲頭畏吾兒的斤帖林爲頭哈

迷里除致傷人命姦盜公事交管民官歸問者其餘軍帖差發不揀甚麼合對問公事有呵朵歹等都護府官人每等者管民官休侵犯者外據畏吾兒哈迷里每自己其閒裏公事有呵委付來的頭目斷者若與百姓每有相爭的公事呵委付來的頭目每與各城子裏官人每一同歸斷者若無畏吾兒哈迷里頭目每呵管民官依例斷者元史巴而朮阿而忒的斤傳前云征罕勉力鎖潭回回諸國後云還鎮火州屯于州南哈密力之地其實一也

的斤帖林蓋哈迷里之部長

尋思干

尋思干本回回故地亦作邪米思干長春西游記云邪米思

千大城大石有國時名爲河中府是也太祖紀十五年夏五月克尋思干城又云十六年春帝攻卜哈兒薛迷思干等城似乎重出攷西游記言乃滿即乃失國依大石士馬復振盜據其土繼而算端西削其地天兵至乃滿尋滅算端亦凶然則十五年所克者乃蠻主屈出律篡西遼而據其地者也既克之後復背蒙古而附算端故次年再攻之算端即算灘回回部長之號亦作遜丹元遺山大丞相劉氏先塋碑車駕征契丹餘族是爲西遼歷古續兒國訛夷朵等城戰合只破之遂征遜丹之斜迷思即邪米於普花兒拒印度噴木連破其軍二十萬與元紀略同蓋屈出律雖篡奪猶襲遼衣冠不改

國號故有西遼之稱其云古續兒國殆以西遼主世襲菊兒汗之號續菊音相近而訛夷朵即遼史之幹耳朵乎屈出律篡國未久人懷反側故取之甚易回回則世守其地部落眾多非旦夕可以成功

趙世延楊朵兒只皆色目

列傳第五卷至三十二卷皆蒙古色目人第三十三卷至七十五卷皆漢人南人也趙世延雍古部人即按竺邇之孫蓋色目人也而與漢人同列誤矣楊朵兒只西夏人元時稱夏人爲唐兀氏唐兀亦色目三十一種之一其人各自有姓如李恆高智耀來阿八赤皆列于色目則朵兒只亦當爲色目

人矣耶律石抹完顏粘合烏古論皆遼金舊族元時謂之漢人漢人有官至宰執者而南人不得入臺省順帝時稍用南人而入參政者僅危素一人耳漢人南人之分以宋金疆域爲斷江浙湖廣江西三行省爲南人河南省唯江北淮南諸路爲南人

不只兒卽布智兒

布智兒傳憲宗以布智兒爲大都行天下諸路也可扎魯忽赤按憲宗紀以牙老瓦赤不只兒等充燕京等處行尙書省事世祖紀憲宗令斷事官牙老瓦赤與不只兒等總天下財賦于燕所云不只兒者卽布智兒也大都卽燕京扎魯忽赤

卽斷事官

見職官志

不只與布智聲相近譯音無定字也昔里鈐

部月乃合布魯海牙傳作卜只兒

今本布魯海牙傳誤卜爲十

祖孫同號

賽典赤回回貴族之稱瞻思丁爲中統至元名臣紀傳皆稱賽典赤而不名其孫伯顏事成宗爲平章政事宰相表至元三十年至大德七年俱有平章賽典赤名惟元貞二年平章有伯顏無賽典赤蓋賽典赤卽伯顏非兩人也蓋襲其祖之號

延祐四年正月肆赦詔

延祐四年正月初十日詔朕仰惟太祖皇帝聖訓若曰應天

順人惟以至誠保安天下宜遵正道重念列聖繼承丕祚我
世祖皇帝混一之初顧予菲德懼弗克荷不遑寧處比者忽
失刺年屬幼弱聽信憸人阿思罕等謀爲不軌構亂我家已
爲行省行臺管軍官等將叛賊阿思罕教化徹里哥思等斬
首以徇其同謀及脅從者欲盡加誅有所不忍宜推曠蕩之
恩開以自新之路可大赦天下自延祐四年正月初十日昧
爽以前除殺祖父母父母不赦外其餘常赦所不原者罪無
輕重咸赦除之若有避罪逃從逆黨或竄匿民間及嘯聚山
林者赦書到日限一百日內許令出首與免本罪限外不首
復罪如初於戲赦過宥罪惟期反側之安發政施仁聿底隆

平之治敢以赦前事相告言者以其罪罪之咨爾有眾體予
至懷此詔稱忽失刺者卽元史之和世球明宗名也仁宗紀
不載此詔蓋天歷以後史官諱而削之也仁宗受位於其兄
乃不立兄子而立其子固有愧宋穆公之讓而明宗出鎮雲
南卽於途中興兵犯闕其罪尤難掩今錄元典章所載詔書
以補本紀之闕

明宗紀載同謀諸
臣無徹里哥思名

且著明宗之罪

本紀失書廷試進士兩科

延祐初始行科舉自後廷試進士狀元某某等若干人皆書
於帝紀唯順帝元統元年賜同同李齊等百人至正十七年
賜倪徵王宗嗣等五十一人紀竝失書蓋順帝無實錄案牘

不備史臣又非一手紀與志不相檢照者多矣元時廷試例以三月七日獨元統元年春順帝尙未卽位選舉志雖載同同等賜及第出身而未詳廷試之期予嘗得是年進士錄讀之乃知廷試在九月三日此可補史文之闕

三公宰相表脫一年

三公宰相兩表俱脫至順三年今以紀攷之三公則燕鐵木

兒太師伯荅沙太傅伯顏太保也宰相則右丞相燕鐵木兒

平章政事欽察台阿里海牙伯撒里禿兒哈帖木兒撒迪右丞闊里吉思左丞趙世安也又泰定帝以致和元年七月崩其九月文宗自立于大都改元天歷表從通鑑例不書致和

而書天歷尙爲有說然九月以前三公宰輔皆朝廷所命自當大書於表今皆削而不書毋乃獎亂而無是非之心乎

元史不諳地理

宋時州有四等曰節度曰防禦曰團練曰刺史亦曰節度爲軍事

三品州防團爲四品州軍事爲五品州凡除節度防禦團練使刺史者皆不之任唯差京朝官知軍州事俱爲親民之官而班資有崇卑故宋志於每州之下繫以節度及防禦團練軍事之名節度又有軍號如大名府稱天雄軍兗州稱泰寧軍之類而防團則無之故節度必繫以某軍此係官制無關地理而宋時諸州又有由軍事防禦升節度者史家省文或

書升某州爲某軍如元符三年升端州爲興慶軍政和七年
升鼎州爲常德軍之類此由散州升爲節度州州牧改用大
僚而州名仍如其舊非改州爲軍也然宋時牧守又有府州
軍監四等而軍監在州之下守臣以知軍繫銜如京東之淮
陽軍京西之信陽軍淮南之盱眙軍浙西之江陰軍此則唐
以前所未有而志地理沿革者所當討論矣元時改府州爲
路旣無節度防禦虛銜則志地理述前代沿革如升州爲節
度直可一筆勾之耳宋志每州之下又有郡名此沿九域志
之文不過爲王公等封爵之用大約襲唐之舊而五代以後
增設者舊未有郡名政和修九域志又復加之此有司文具

尤無當於地理沿革之數者也修元史者皆草澤腐儒不諳
掌故一旦徵入書局涉獵前史茫無頭緒隨手捋摺無不差
謬偶舉數條以當笑柄如滑州自唐宋迄金元無異名而志
乃云唐改靈昌郡宋改武成軍元仍爲滑州攷唐志雖州郡
兼稱而改州爲郡不過天寶至德十餘年耳乾元以後仍爲
滑州豈可以此十數年槩唐一代且改州爲郡十道皆同不
得謂滑改而它州不改也武成爲節度軍額而滑之升節度
始于唐本號義成軍宋太宗時避諱乃改武成作志者并唐
方鎮表亦未讀矣隨州亦唐所置而宋因之其稱崇信軍者
節度軍號非改州爲軍也棗陽本隨州屬縣南宋升爲棗陽

軍則與隨州各爲一郡矣而志乃云宋爲崇信軍又爲棗陽軍此兩軍者一爲虛銜一爲實土而混而一之旣已不分阜白且棗陽與隨各自爲郡而強合之又云復因兵亂遷徙無常欲以彌縫其失真癡人說夢矣河中府自唐中葉已爲節鎮稱護國軍而河中府之名不改宋金皆因之志乃云宋爲護國軍金復爲河中府不知宋金皆稱河中府與唐無異護國軍之號自唐五代宋金亦未有異宋非廢府而稱軍金亦未嘗去護國軍之號志中此類甚多舉之不勝舉也

宋時州有節度防禦團練刺史四等以是分州之大小如今制州縣分縣簡耳單本刺史州後升爲團練其州名仍舊也志乃云後唐改爲單州宋升團練州是誤何團練爲州名矣史臣之不學如此豈不貽笑千古

志又云濟寧路唐麟州周於此置濟州按元之濟寧路治鉅野縣在唐則爲鄆州之鉅野縣耳唐志雖云武德四年以縣置麟州五年州廢然唐有國三百年其稱麟州者僅一年豈可以此槩一代乎宋承後周之舊濟州眞治鉅野矣乃置之不道又何說也志于濟州下又云唐以前爲濟北郡治單父唐初爲濟州又爲濟陽郡仍改濟州周瀕濟水立濟州宋因之此條尤可怪異夫元之濟州治任城唐之濟州則治盧卽隋之濟北郡也元和以後省濟州以盧縣隸鄆州自是無濟

州之稱矣後周始于鉅野立濟州盧與鉅野邈不相涉豈可溷而爲一周瀕濟水立濟州二句當書于濟寧路亦不當在此條也唐以前濟北郡治單父不知何據攷太平寰宇記單州單父縣後魏嘗置北濟陰郡或因是誤切爲濟北郡邪郴州之郴陽縣志云舊爲敦化縣至元十三年改今名予向頗疑之謂湖南舊爲宋土而敦字犯宋廟諱且宋志郴州倚郭爲郴縣非敦化也頃見王象之輿地紀勝引寰宇記云晉天福初避廟諱改郴州爲敦州改郴縣爲敦化漢初州縣名悉復舊是敦化之名乃石晉所改未幾卽廢而元史臣乃以爲至元十三年改敦化爲郴陽眞可笑也

漢人八種

陶九成輟耕錄載漢人八種曰契丹曰高麗曰女直曰竹因歹曰朮里闊歹曰竹温曰竹亦歹曰渤海按遼金元三史唯見契丹女直高麗渤海四國餘未詳攷元史鎮海傳從攻塔塔兒欽察唐兀只温契丹女直河西諸國只温蓋卽竹温之轉歟

咸寧字誤

地理志興和路有咸寧縣元初隸宣德府中統三年來屬咸寧當是咸寧之譌金志撫州有咸寧縣承安二年以撫州新城鎮置元之興和路卽金撫州則咸寧之爲咸寧信矣劉伯

林傳金末為威寧防城千戶即此縣也

興德字誤

保安州金為興德府興德當作德興石高山傳德興府人

德興本作

迦堅茶寒

太宗紀九年丁酉春獵于揭揭察哈之澤其年四月築掃隣作迦堅茶寒殿揭揭察哈即迦堅茶寒也譯音無定字史家不能攷正後世遂以為兩地矣地理志迦堅茶寒殿在和林北七十餘里

太宗三萬戶名不同

王懌撰史忠武公家傳云太宗即位朝議方選三大帥分統漢地兵上素聞公賢以杖麾公及劉黑馬蕭札刺居右詔為萬戶其居左者悉為千戶長姚燧撰邱澤神道碑云國初以二萬戶鎮撫中夏右則劉伯林黑馬之父軍秦左則粘合重山軍燕顧成則益太尉史忠武公天澤為真定河間濟南東平大名五路萬戶於中顧成謂太宗也蓋用漢書賈誼語元史劉黑馬傳太宗即位始立三萬戶以黑馬為首重喜史天澤次之三書所述劉史兩萬戶竝同若蕭札刺為石抹也先之子石抹氏即蕭氏與粘合重山初非同族元史粘合重山傳中無重喜名史別有重喜傳又不云為萬戶王姚二君皆習于掌故史家為黑馬立傳

亦必本諸家狀不知何以互異若此耶律禿花傳統萬戶札刺兒劉黑馬史天澤伐
金此札刺兒即蕭札刺也石抹也先傳作查刺與王暉所稱三萬戶正合劉黑馬傳又云增置七萬戶仍以黑馬為首重喜史天澤嚴實等次之此七萬戶之名史家止舉其四餘無攷

也可太傅

食貨志歲賜篇有也可太傅按邪律禿花傳拜太傅總領也可那延封濮國公即志所稱也可太傅也蒙古語大為也可凡官名也可者第一之稱此志有也可怯薛職官志有也可札魯忽赤皆取第一義

四怯薛

兵志太祖功臣博爾忽博爾朮木華黎赤老溫號撥里班曲律猶言四傑也太祖命其世領怯薛之長怯薛者猶言番直宿衛也每三日而一更申酉戌日博爾忽領之為第一怯薛即也可怯薛博爾忽早絕太祖命以別速部代之非四傑功臣之類故太祖以自名領之云也可者言天子自領之也亥子丑日博爾朮領之為第二怯薛寅卯辰日木華黎領之為第三怯薛巳午未日以赤老溫領之為第四怯薛赤老溫後絕其後怯薛常以右丞相領之食貨志歲賜篇則有也可怯薛有忽都荅兒怯薛有帖古迭兒怯薛有月赤察兒怯薛此至元二十一年事月赤察兒者博爾忽之後絕而又繼然其

次已在第四忽都答兒帖古迭兒則不知何人之後矣

五部將名互異

闊闊不花傳歲庚寅

當是庚辰

太祖命太師木華黎伐金分探馬

赤爲五部各置將一人闊闊不花爲五部前鋒都元帥歲丙申太宗命五部將分鎮中原闊闊不花鎮益都濟南按察兒鎮平陽太原孛羅鎮真定肖乃台鎮大名怯烈台鎮東平兵志中統三年三月詔真定彰德邢州洛磁東平大名平陽太原衛輝懷孟等路各處有舊屬按札兒孛羅笑乃解闊闊不花不里合拔都兒等官所管探馬赤軍

石高山傳昔太祖皇帝所集按察兒孛羅窟里台孛羅海拔

都闊闊不花五部探馬赤軍金亾之後散居收地多有入民籍者

今按五部將之名唯孛羅闊闊不花二人無異文按察兒即按札兒肖乃台即笑乃解怯烈台即窟里台不里合拔都兒即孛羅海拔都或有肖乃台而無不里合或有怯烈台而無孛羅海似當以兵志爲正蓋肖乃台本禿伯怯烈氏故又有怯烈台之稱或稱肖乃台或稱怯烈台其實即一人耳史家疑孛羅海與孛羅爲重出故闊闊不花傳誤分怯烈台以當五人之數今依兵志作不里合則犁然有別矣

汪世顯傳不可信

史家立傳往往徵采家傳碑志事迹多文飾不可信如汪世顯傳稱仕金屢立戰功官至鎮遠軍節度使鞏昌便宜總帥金平郡縣望風款附世顯獨城守及皇子闊端駐兵城下始率眾降皇子曰吾征四方所至皆下汝獨固守何也對曰臣不敢背主失節耳如傳所言則是袁昂馬仙琕之流也及讀金史郭蝦蟆傳則稱天興二年哀宗遷蔡州慮孤城不能保擬遷鞏昌以粘割完展爲鞏昌行省三年春正月完展聞蔡已破欲安眾心城守以待嗣立者乃遣人稱使者至自蔡有旨宣諭綏德州帥汪世顯者亦知蔡凶問且嫉完展制已欲發矯詔事因以兵圖之然懼蝦蟆威望乃遣使約蝦蟆并力

破鞏昌使者至蝦蟆謂之曰粘割公奉詔爲行省號令孰敢不從今主上受圍于蔡擬遷鞏昌我輩旣不能致死赴援又不能叶眾奉迎乃欲攻粘割公先廢遷幸之地上至何所歸乎汝帥若欲背國家任自爲之何及于我世顯卽攻鞏昌劫殺完展送款于大元復遣使者二十餘諭蝦蟆以禍福不從是世顯以偏裨戕主帥背主嗜利乃小人之尤者且久通款于蒙古何待闊端兵至始率眾降乎蘇天爵名臣事略誤信其家傳書之明初史臣又承天爵之誤不加訂正畢尙書沈續通鑑稿成嘗屬子參校因爲辨證之

鄧州移復

趙范之失襄陽始於趙祥以鄧州叛而宋史諱不書元史太宗紀八年命鄧州趙祥從皇子曲出充先鋒南伐亦不詳趙祥降附本末今據姚燧所撰鄧州長官趙公神道碑云祥字天麟其先居代之繁時金末去其鄉三徙爲蔡之平與人天興播蔡倡義兵數千爲帥甲午金亾將麾下步騎數千入宋時襄陽開制閫授信效左軍統制後制閫厭降將多叵測謾爲受犒欲盡阬之大將江海諫曰人窮來歸誅之不義又吾閫所節度四十五軍半北人今此加誅則吾軍北人各有異心矣漢北之州鄧爲近去吾閫程再日耳乘彼虛棄未戍盍遣是眾先之在彼有生降之德在彼有復地之利一舉而得

兩者也閫然之別遣路鈴呼延實將若干人爲監來戍至則與實不相得軍士譁諫皆言制閫不足爲盡力明年乙未十月大兵略地漢上集將佐南門公抱劔前曰始吾入宋求活吾麾下數千人與若妻孥而制閫欲以計殲之今幸出戍又令別將監之一旦誣以它罪無噍類矣誠不忍與若膾脯寇手心歸大朝後應者斬統領徐海持不可立斷其首一軍皆呼抃受命馳造實營執以出盟令呼宋兵投仗釋甲具車馬歸之襄陽乃開門迎元兵居再月太子南征還過教以是城甚近襄陽力孤不能自完與均唐三州民徙洛陽之西三縣鄧治長水均治永寧唐治福昌明年丙申襄樊亦徙洛陽其

年入覲特賜金符錦衣許出戰督軍入守字民辛丑授鄧州
長官奏以弟將州兵是州兵民始分後十二年癸丑史忠武
公經略河南始屯田漢上盡還徙鄧均唐襄樊五州民實南
公始復鄧時宋已築襄樊均皆設重兵三州民還者無所於
歸襄樊僑治州北均僑治西皆倚公爲援丙辰乞骸骨不報
明年疾卒年六十有一所述背宋歸元事極分明漢上五州
移徙事又可補地理志之漏略

胡土虎

太宗六年以胡土虎那顏爲中州斷事官七年遣皇子曲出
及胡土虎伐宋胡土虎又作忽都鐵邁赤傳又作忽都虎食貨志又

作忽篤華

石抹明安傳

案石抹明安傳次子忽篤華太宗時爲金

紫光祿大夫燕京等處行尚書省事兼蒙古漢軍都元帥不
云爲中州斷事官者史之脫漏也石抹氏自明安至咸得不
相繼爲燕京行省胡土虎蓋承其兄職及金亡之後又令斷
事中州括中原人戶當在其時矣石高山傳云父忽魯虎從
太祖定中原太宗賜以東昌廣東四十餘戶而食貨志忽都
虎官人壬子年查認過廣平等處四千戶似卽一人豈石高
山卽石抹明安之後史誤認石抹氏爲石氏耶

李全字誤

趙天錫傳云甲申彭義斌據大名冠氏元帥李全降之又云

李全在大名結其帥蘇椿納金河南從官鄭侗初疑同時有
兩李全及讀元遺山千戶趙公神道碑乃人名泉史家
以音相近譌為全字遂與益都之李全相混天錫以行臺
公薦宣授行軍千戶見遺山碑而本傳不載蓋以千戶為不
足書耳不知元初萬戶最為領兵要職殿實雖為行臺亦在
七萬戶之列千戶佩金符較之萬戶佩金虎符者僅降一等
未可略而不書

月乃合

月乃合傳但云字正卿不言有兩名按元好問恆州刺史馬
公碑即慶云子男三人長三達次鐸刺次福海不審孰為月

乃合

雍古

月乃合傳其先屬雍古部徙居臨洮之狄道金略地盡室遷
遼東祖把埽馬野禮屬徙靜州之天山按元遺山有恆州刺
史馬君神道碑即月乃合之父昔吉里思也其述世系云出
于花門貴族宣政之季與種人居臨洮之狄道蓋已莫知所
從來矣金兵略地陝右盡室遷遼東因家焉太宗嘗出獵恍
惚聞見金人挾日而行心悸不定莫敢仰視因罷獵而還敕
以所見者物色訪求或言上所見殆佛陀變現而遼東無塔
廟尊像不可得唯回鶻人梵唄之所有之因取畫像進之真

與上所見者合上歡喜讚歎爲作福田以應之凡種人之在
臧獲者賞爲平民賜錢幣縱遣之然則雍古部殆回鶻之別
支乎回鶻卽畏兀兒與回回不同種金史馬慶祥傳先世自
西域入居臨洮狄道似誤以回鶻爲回回矣

劉敏傳

劉敏字有功宣德青魯人按元好問大丞相劉氏先塋神道
碑云世居宣德縣北鄉之青魯里青魯非縣名當刪碑稱字
德柔以小字某行豈有功其小字歟抑以賜名玉出干爲小
字歟

歲壬申太祖師次山西敏時年十二從父母避地德興禪房

山兵至父母棄敏走大將憐而收養之碑云甲戌秋師次燕
西公年甫十二隨其家人避兵德興之禪房山旣而盡室被
俘公在一大首領麾下日避役御營犒宴之人什伍爲偶
公輒入座共食上舉目見之親問姓名及所以來者公跪自
陳主帥不見卹無以自存願畱止營中上召主帥名索公得
之隸中宮帳下與傳不同當以碑爲可信

帝征遼西諸國碑云車駕征契丹餘族是爲西遼遼西當爲
西遼之譌

元初十路

太宗二年始置十路徵收課稅使 燕京 宣德 西京

太原 平陽 眞定 東平 北京 平州 濟南
世祖中統元年立十路宣撫司 燕京 益都濟南 河南
北京 平陽太原 眞定 東平 大名彰德 西京
京兆

宣聖配享

元初釋奠先聖以顏孟配享蓋用宋金舊制至延祐三年始
增曾子子思配享則依宋咸淳三年新制也祭祀志所載儀
注止有詣兗國公鄒國公神位前不及郈沂二公此延祐以
前之制禮樂志大德十年命江淮行省製造宣聖廟樂器令
翰林院新撰樂章自迎神至送神凡九章是時郈沂二公未

與配享故無酌獻之曲本非欠闕史家誤增二公酌獻之曲
注以爲闕蓋失之不攷矣志又別載宣聖樂章凡十六章今
攷諸宋史實皆襲用宋大晟舊詞唯郈沂二公酌獻之章則
舊詞所未有殆延祐以後補撰若大德所撰則固未嘗播之
律呂也

泰定皇后

吳文正公年譜泰定元年七月中書會議司天監屬許其官
長所許二月皇后出殯係犯復日又葬日正犯聖算行年輕
侮不敬致二后同日而崩刑部取罪狀中書奏兩院會議公
曰云云此條元槧本有之而不載文正之議今刻文正集年

譜并刪此事矣攷元史泰定元年三月丙午冊八八罕氏爲
皇后此正宮皇后也此稱皇后出殯及二后同日而崩皆不
見於紀蓋元世諸妃稱皇后者甚眾史不能具載而吳澄之
議云何亦無可攷矣

蒙古語

元人以本國語命名或取顏色如察罕者白也哈刺者黑也
昔刺者黃也亦作失刺忽蘭者紅也孛羅者青也亦作博羅闊闊者亦
青也亦作擴廓或取數目如朵兒別者四也亦作里班塔本者五也
只兒瓦歹者六也朵羅者七也乃蠻者八也也孫者九也哈
兒班荅者十也忽陳者三十也亦作忽噴乃顏者八十也亦作乃燕明

安者千也禿滿者萬也或取珍寶如按彈者金也亦作阿速

不台者珠也亦作不碎納失失者金錦也亦作石失失列門者銅

也亦作昔刺門帖木兒者鐵也亦作鐵木爾或取形相如你敦者

眼也赤斤者耳也或取吉祥如伯顏者富也只兒哈朗者快

樂也亦作兒哈郎阿木忽郎者安也賽因者好也也克者大也蔑

兒干者多能也一作爾傑或取物類如不花者牯牛也亦作補化不

忽者鹿也亦作伯忽巴而思者虎也阿爾思蘭者師子也脫來者

兔也亦作討來火你者羊也昔寶者鷹也昂吉兒者鴛鴦也或取

部族如蒙古台唐兀台遜都台瓮吉刺歹兀良哈歹塔塔兒

歹亦乞列歹散木歹亦作竹台肅良合亦作謂高麗人也皆部族之

名亦有以畏吾語命名者如也忒迷失者七十也阿忒迷失者六十也皆畏吾語此外如文殊奴普顏奴觀音奴佛家奴汪家奴眾家奴百家奴醜厮醜驢和尙六哥五哥七十八十之類皆是俗語或厭其鄙俚代以同音之字如奴之爲訥驢之爲閩哥之爲格不過遊戲調弄非有別義也

僧稱吉祥

予讀元史仁宗紀延祐六年二月特授僧從吉祥榮祿大夫大司空加榮祿大夫大司徒僧文吉祥開府儀同三司初未解吉祥之名後閱釋藏有至元法寶勘同總錄十卷奉詔編修者爲順德府開元寺佛日光教大師沙門慶吉祥平灤路

水巖寺傳法輔教大師沙門恩吉祥執筆者爲大寶集寺傳法潮音妙辨大師沙門海吉祥真定府興化寺傳法通元大師沙門溫吉祥校勘者爲大都大憫忠寺傳法通辨大師沙門瑞吉祥大都大昊天寺傳法元悟大師沙門習吉祥上都黃梅寺住持通慧大師沙門溫吉祥大都宏法寺通顯密二教演祕大師沙門澂吉祥大崇國寺臨壇大德圓融崇教大師沙門演吉祥大聖壽萬安寺臨壇大德崇教大師沙門應吉祥校證者濟寧路金山寺妙辨通義大師沙門慶吉祥證義者大聖壽萬安寺傳大乘戒臨壇大德沙門理吉祥宣授江淮釋教都總攝扶宗宏教大師釋行吉祥聖壽萬安寺都

總統佛覺普安大師沙門揀吉祥宣授諸路釋教都總統道
通眞智大禪師昭吉祥乃知元時以吉祥爲僧之美號演吉
祥名定演趙子昂爲撰碑者也

道童

至正中名道童而見於史者兩人一爲高昌人號石巖由平
江路總管累遷江西行省左丞相謚忠烈在列傳一百四十
四卷一爲唐兀人字德章自號賀蘭逸人至正十年爲江東
廉訪使汪澤民傳至正十五年斬黃賊犯宣州江東廉訪使
道童雅重澤民日就之詢守禦計城得無恙此卽唐兀之道
童也其明年城陷澤民遇害史不言道童所終予嘗見江東

憲司題名碑知其氏族記卽澤民所撰稱道童爲寧夏中大
夫公蓋元時稱西夏人曰唐兀氏寧夏本西夏地也

順帝後世次

元順帝以至正廿八年失大都北走又二年殂於應昌太子
愛猷識理達臘嗣位上廟號曰惠宗明年改元宣光立八年
而殂子脫古思帖木兒嗣位上廟號曰昭宗改元天元立十
年爲其下也速迭兒所弑實洪武二十一年也又五傳至坤
帖木兒皆被弑族人鬼力赤篡立去國號稱可汗從其舊俗
明史成祖紀永樂六年諭本雅失里曰自元運旣訖順帝後
愛猷識理達臘至坤帖木兒凡六傳瞬息之間未聞一人善

終者蓋脫古思帖木兒之後坤帖木兒之前尙有三四傳其名不可攷矣明太祖紀洪武二十二年也速迭兒弑其主脫古思帖木兒而立坤帖木兒與成祖紀外國傳小異

高麗王二名

元初高麗王距尙元公主其子璋亦尙主賜蒙古名曰益智禮普化其後子孫相承皆有二名璋子燾曰阿刺忒納失里燾子禎曰不荅失里禎子昕曰八禿麻朵兒只禎弟祺曰伯顏帖木兒又名顓古元史外國傳自燾以後傳授事迹俱脫漏失書今取朝鮮史略參攷得之

王暁位事不足信

王璋本襲父封高麗王至大三年改封瀋王皇慶二年遣璋就國璋乃請辭位以長子燾爲征東行省左丞相而身留京師又以姪延安君暁爲世子蓋欲兼兩王以燾承世封以暁承瀋王封也外國傳謂燾受遜位以仁宗皇慶二年四月封高麗王是年其弟暁立爲世子不知暁爲燾之從弟所受者瀋王世子非高麗世子此一誤也傳又謂燾傳其弟暁按仁宗紀延祐三年璋請傳瀋王位于世子暁許之而諸王表瀋王一條云高麗王暁泰定三年以駙馬襲封二文似互異今攷之乃知非誤蓋璋雖以延祐三年傳王位于暁而瀋王之印猶在璋所至泰定二年璋卒暁乃襲爵受印表所書者受

印之歲紀所書者奏請之歲也高受於璋非受於壽高雖承
藩王之封而壽之爲高麗王如故也而史遽謂壽傳其弟又
誤之甚矣據朝鮮史壽嗣立後至元五年薨子禎嗣淫縱無
檢其臣曹頤謀廢之而立藩王不克被誅頤黨訴于朝明年
徵禎囚刑部久之得釋禎猶不悛至正三年遣使如高麗願
詔禎出迎縛之以檻車流于揭陽未至卒四年禎子听嗣八
年薨無子九年以禎庶子眡襲十一年詔廢眡而立禎之母
弟祺其傳授分明如此高卒於至正五年雖有奪嫡之志終
以眾議不可而止外國傳所書殊不可信

高麗王大順

諸王表藩王凡三人其一云高麗王大順以駙馬封列于王
璋王壽之前按高麗王無名大順者唯眡首尚主成宗紀亦
有封眡藩陽王之文大順二字恐誤

史臣分修志傳姓名可攷者

五行志胡翰撰其序論載文集中外國傳別宋禧撰靜志居
詩話載其寄宋學士詩云修史與末役乏才媿羣賢強述外
國傳荒疎僅成篇謂自高麗以下悉其手筆然此數篇最爲
淺率觀其寄潛溪詩則荒疎之病无逸固未嘗自諱也

明史

明史自康熙十八年開局纂修五十人皆以博學宏詞薦入

翰林者也總裁官初用葉方藹張玉書其後湯斌徐乾學陳廷敬張英王鴻緒相繼爲總裁久之未成特勅廷敬任本紀玉書任志表鴻緒任列傳五十三年鴻緒列傳稿成表上之而本紀志表尙未就鴻緒復加纂輯雍正元年再表上之於是明史始有全稿乾隆初

詔修明史總裁官大學士張廷玉奏卽以鴻緒稿爲本而稍增損之九年史成頒行天下蓋閱六十餘年之久議論平允攷稽詳核前代諸史莫能及也其例有別前史所未有者如英宗實錄附景泰七年事稱郕戾王而削其帝號此當時史臣曲筆今分英宗爲前後兩紀而列景帝紀于中斟酌最爲

盡善表之有七卿蓋取漢書公卿表之意明時閣部並重雖有九卿之名而通政大理非政本所關則略之南京九卿亦閑局無庸表也闖黨前代所無較之姦臣佞幸又下一格特書以儆人臣土司叛服不常旣不可列于外國又不可廁於列傳故皆別而出之石砮秦良玉以婦人而列武臣之傳嘉其義切勤王不以尋常土司例之也

程濟

永樂四年二月辛巳唐府長史程濟韓府長史司典簿魏居敬犯夜禁兵馬司請送法司特命宥之此與世所傳建文從亾之程濟未知卽一人否

程濟事見於鄭曉遜國臣記

洪武鈔

永樂實錄洪武三十五年即建文四年十一月戶部尚書夏原吉言寶鈔提舉司鈔板歲久篆文銷乏且皆洪武年號明年改元永樂宜併更之上曰板歲久當易則易不必改洪武為永樂朕所遵用皆太祖成憲雖永用洪武可也

世襲五經博士始于明

曲阜孔氏正德元年授孔聞禮始主子思子祀事

衢州孔氏正德元年授孔彥繩始

顏氏景泰三年授顏希惠始

孟氏景泰三年授孟希文始

曾氏嘉靖十八年授曾質粹始

仲氏崇禎十六年授仲于陞始

周氏景泰七年授周冕始濂溪先生十二代孫

程氏景泰六年授程克仁始伊川先生十七代孫也明道先

生後失傳崇禎三年復增博士一人以伊川裔孫程接道為

之使奉明道祀

張氏天啟二年授張文運始橫渠先生十四代孫也

邵氏崇禎三年授邵繼祖始康節廿七代孫也

建安朱氏景泰六年授朱樾始文公九世孫也

婺源朱氏嘉靖二年授朱墅始文公十一世孫

元後裔

元順帝以至正廿八年北奔又二年殂於應昌傳子及孫凡十有八年而爲其臣也速迭兒所弑又五傳至坤帖木兒不知于順帝何屬自後稱元後者並言出于太祖其世系均不可攷矣自坤帖木兒後有鬼力赤者篡立始去帝號自稱可汗永樂三年阿魯台殺鬼力赤迎元之後本雅失里于別失八里立爲可汗十年爲瓦剌馬哈木所殺阿魯台立阿台爲可汗而馬哈木亦立荅里巴爲可汗自是達達有二可汗宣德九年瓦剌脫歡襲殺阿魯台欲自立爲可汗眾不可乃立元後脫脫不花爲可汗俾領阿魯台所部阿台竄居亦集乃

路正統三年阿台爲脫脫不花所殺景泰二年瓦剌也先弑脫脫不花四年自立爲可汗六年爲阿剌知院所殺達達部長孛來攻阿剌求脫脫不花子馬兒可兒立之號小王子小王子之名自此始天順六年麻兒可兒復與孛來相攻麻兒可兒死眾共立馬古可兒吉思亦號小王子成化元年小王子與毛里孩先後入河套未幾孛來弑馬古可兒吉思毛里孩殺孛來更立它可汗有斡羅出者亦居河套與毛里孩相仇殺毛里孩遂殺其所立可汗而逐斡羅出八年滿魯都一作魯都入河套自稱可汗九年敗走十三年死亦思馬因主其兵柄久之亦死十九年以後入寇者稱迤北小王子而史失

其名矣宏治元年小王子奉書自稱大元大可汗十三年小
王子復居河套正德中數為邊患嘉靖十一年小王子稍厭
兵乃徙幕東方稱察罕土門汗見明史張學顏傳聲譌為土蠻其稱
插漢者即察罕之異文也李成梁傳插漢部長土蠻隆慶以後俺荅諸部
皆封貢獨土蠻屈強東北塞外其名與傳授次序不可得聞
矣其族屬可見者從父黑石炭弟委正大委正從弟煖兔拱
兔子伯言台周從子黃台吉見李成梁傳萬歷末察罕虎墩兔自
稱林丹汗雄長東北塞外蓋即土蠻之族史言其祖打來孫
始駐牧宣塞外俺荅方強懼為所併乃徙帳于遼收福餘雜
部四傳至虎墩兔豈打來孫即嘉靖徙幕之小王子乎趙國

忠傳嘉靖廿一年再鎮遼東小王子打來孫以數萬騎寇錦
州是打來孫即小王子之證也戚繼光傳俺荅已通貢獨小
王子後土蠻徙居插漢地控弦十餘萬常為薊門憂然則插
漢者游牧之地土門汗者其號而打來孫者其名以其為元
裔故諸部尊之曰小王子其改土門汗為土蠻則當時文報
之詞不欲其稱汗耳虎墩兔又稱插漢兒王子蓋猶襲小王
子之號合諸傳參之土蠻與插漢本非兩部斷可識矣

泰寧

兀良哈三衛洪武廿二年置成祖割大寧地與三衛自後雖
常通貢而叛服靡常明史立朵顏傳以泰寧福餘附焉中葉

以後但述朵顏事不及泰寧福餘今按李成梁傳有泰寧部
長速把亥炒花李化龍傳李成梁殺泰寧速把亥其子把兔
兄弟炒花據舊遼陽以北居兩河之中益結土蠻為患麻貴
傳泰寧炒花素桀驚九子各將兵是泰寧之為邊患尤甚于
朵顏也速把亥死於萬歷十年把兔兒於二十二年入寇後
亦死炒花則崇禎中尚存

河套

河套者漢朔方郡地在延綏邊外明初嘗設兵戍以曠遠內
徙天順間毛里孩等三部始入為寇然不敢久駐成化五年
有阿羅出者始入居之

外國傳以
為天順間

六年孛羅忽渡河與阿羅

出合七年札加思蘭亦來居焉八年滿都魯入河套自稱可
汗以札加思蘭為太師九年王越襲滿都魯等于紅鹽池大
破之焚其廬帳諸部皆遁去

宏治元年小王子與伯顏猛可王等入貢漸往來套中為寇
八年北部亦卜剌因王等入套駐牧十三年冬小王子復居
河套正德五年亦卜剌與小王子相攻不勝竄西海九年小
王子部長卜兒孩以內難復奔據西海嘉靖十一年小王子
徙帳東方而吉囊俺荅遂據套內皆小王子從父行也二十
二年吉囊死諸子狼台吉等散處河西勢既分而俺荅獨盛
二十九年俺荅移駐威寧海子而吉囊子吉能居河套如故

隆慶五年俺荅納款吉能與其姪切盡等亦請市封吉能都督同知久之吉能死子卜失兔嗣爲都督同知所屬四十二枝各相雄長東有沙計中有擺言太西有火落赤皆桀驁卜失兔徒擁虛名而已萬歷四十一年卜失兔襲封順義王其子主套部亦稱吉能蓋蒙古多以號行吉囊亦號而非名子孫世襲其號囊能聲相近中國人強分之耳

順義王俺荅

俺荅既移駐威寧海子其秋遂犯京師終嘉靖之世無歲不有邊警隆慶四年冬俺荅之孫把漢那吉以俺荅奪其妻恚而來降總督王崇古請善遇之令俺荅縛送板升諸叛人俺

荅因請封貢詔從之明年封俺荅爲順義王其弟昆都力哈

卽老把都

子黃台吉

卽辛愛

皆授都督同知賓兔台吉等十人授指

揮同知那木兒台吉等十九人授指揮僉事打兒漢台吉等十八人授正千戶阿拜台吉等十二人授副千戶恰台吉等二人授百戶名俺荅所居城曰歸化萬歷十年俺荅卒十一年子黃台吉襲王改名乞慶哈十三年卒十五年子摺力克襲王封其妻三娘子忠順夫人三娘子卽俺荅所奪把漢妻也歷配三王爲中國守邊諸部皆畏服之三十五年摺力克卒未有嗣忠順夫人率所部仍效貢四十一年忠順卒封卜失兔爲順義王

外國傳卜失兔爲摺力克未詳似是吉囊之後

譯音無定字

王崇古傳把漢自聘我兒都司女即外國傳之襖兒都司也
北音我與襖相近

張學顏傳前稱察罕土門汗後稱土蠻土蠻即土門汗也李
成梁傳前稱大委正後稱一克灰正亦是一人蒙古語大為

伊克亦曰一克王崇古傳俺答妻一克哈屯蓋其大妻也元
史作也可兵志作也可怯薛謂第一怯薛也
委灰音相似也

李成梁傳有西部又漢即插漢也亦即察罕見張學顏傳
大清一統志作察哈爾

外國傳有銀定歹青亦作銀定歹成見蕭如薰達雲柴國柱

傳

十駕齋養新錄卷九

終

十駕齋養新錄卷第十

嘉定錢大昕

三公

尚書大傳曰煙氛郊社不修山川不祝風雨不時霜雪不降
責於天公臣多弑主孽多殺宗五品不訓責於人公城郭不
繕溝池不修水泉不修水為民害責於地公王者三公各有
所主論衡明
考篇天公司徒人公司馬地公司空也

文選載任彥昇竟陵文宣王行狀沈休文安陸昭王碑文稱
公不稱王者爵列親王不如三公之位尊也竟陵生為三公
安陸亦贈司徒

故得稱公宋制朝會宰相班在親王之上

員缺

顧寧人日知錄謂員缺之名自晉時已有之今攷漢書循吏傳公卿缺則選諸所表以次用之酷吏傳後左馮翊缺韓安國傳梁內史缺翟方進傳杜業言方進為京兆尹時陳咸為少府在九卿高第陛下所自知也方進素與司直師丹相善臨御史大夫缺使丹奏咸為姦利請案驗卒不能有所得而方進果自得御史大夫薛宣傳御史大夫任重職大非庸材所能堪今當選於羣卿以充其缺又云會司隸缺佞幸傳其後御史大夫缺則西漢已有缺稱不始于晉也

大尙書

予初讀隋書經籍志四人月令一卷漢大尙書崔實撰疑其有誤後讀洪氏隸續載劉寬碑陰有大尙書河南張祇字子戒一人洪云碑有大尙書張祇祝睦碑亦云拜大尙書攷東京官制唯鴻臚司農長秋有大字尙書六人分為六曹初無大尙書及觀祝睦後碑但云拜尙書尙書僕射乃知大尙書者以其長於諸曹故加大以別之然後向者之疑始釋蓋當時官曹有此稱未著於令甲也

大著作

魏太和中始置著作郎職隸中書晉元康初又隸祕書著作郎一人謂之大著作專掌史任又置佐著作郎八人

見史通史官篇

五官

漢有五官中郎將比二千石五官中郎比六百石五官侍郎比四百石五官郎中比三百石郡國亦有五官掾注家不言五官何義予按淮南兵略訓云夫論除謹動靜時吏卒辨兵甲治正行伍連什伯明鼓旗此尉之官也前後知險易見敵知難易發斥不忘遺此候之官也監路亟行輜治賦丈均處軍輯并竈通此司空之官也收藏於後遷舍不離無淫輿無遺輜此輿之官也凡此五官之於將也猶身之有股肱手足也又云將軍不與於五官之事而為五官督五官之名或出於此但據淮南所稱有尉官有候官有司空官有輿官而尚

闕其一是必有脫文矣

大學士

唐書百官志修文館

後改昭文館

景龍二年始置大學士四人以

象四時學士八人以象八節直學士十二人以象十二時此

大學士設官之始

李嶠宗楚客趙彥昭韋嗣立為大學士李適劉憲崔湜鄭愔盧藏用李义岑義劉子

元為學士薛稷馬懷素宋之問武平一杜審言沈佺期閻朝隱為直學士又引徐堅韋元且徐彥伯劉允濟等備員見文

藝傳李嶠宗楚客趙彥昭韋嗣立皆宰相也天寶二載崇賢館

置大學士二人以宰相為之至德二年置集賢院大學士貞

元四年罷崇元館集賢院大學士

崇元即崇賢也

按張說傳始帝欲

授說大學士辭曰學士本無大稱中宗崇寵大臣乃有之臣

不敢以爲稱說時爲集賢院學士也李泌傳加集賢殿崇文館大學士泌建言學士加大始中宗待及張說爲之固辭至崔圓復爲大學士亦引泌爲讓而止此泌傳之誤蓋集賢之置大學士始於崔圓正在至德二載而貞元四年學士去大字則由於泌之請耳然自元和以後宰相兼宏文館集賢殿大學士率以爲常鮮有如張李二公之能讓者矣宋初昭文館集賢殿大學士皆宰相領之蓋沿唐五代之舊其後置觀文殿資政殿大學士雖不任事亦以前宰執充餘官不得與焉明代始專以殿閣大學士爲宰輔之官然秩止五品 國朝始升爲正一品

總督巡撫

總督字始見於漢書敘傳云總督城郭三十有六南北朝史多用此字如晉書謝元傳以方平河北幽冀宜須總督魏書任城王澄傳以澄總督二鎮授之節度于烈傳遷司衛監總督禁旅南史柳仲禮傳與諸藩赴援見推總督劉之亨傳總督眾軍杖鉞而西吳明徹傳吾爲總督必須身居其後王猛傳總督所部赴援北史景穆十二王傳梁武以爲北道總督齊本紀節閔以長孫承業爲大行臺總督焉李常傳總督三軍揚旌恆朔李平傳陛下不以臣不武委以總督之任周書文帝紀拜章武公導爲大將軍總督畱守諸軍是也巡撫字

亦見於南北朝南史袁昂傳帝使豫州刺史李元履巡撫東
土北史趙彥深傳文襄慮河南有變仍自巡撫周書武帝紀
詔皇太子贊巡撫西土是也總督巡撫之語由來已久其定
爲官名入銜則自明始

唐人服色視散官

野客叢書云唐制服色不視職事官而視階官之品至朝散
大夫方換五品服色衣銀緋白樂天爲中書舍人知制誥元
簡爲京兆尹官皆六品謂階官也尙猶著綠其詩所謂鳳閣舍人
京兆尹白頭猶未脫青衫南宮啟請無多日朝散何時復入
銜劉夢得賀給事加五品詩曰八舍郎官換綠衣元微之作

武儒衡陞朝散大夫制曰今由是級則服色驟加誠足貴矣
樂天授朝散大夫制曰蔭子封妻豈惟腰白金而已

唐時臣僚章服不論職事官之崇卑唯論散官之品秩雖宰
相之尊而散官未及三品猶以賜紫繫銜舊唐書宣宗紀有
正議大夫守中書侍郎同平章事集賢殿大學士賜紫金魚
袋馬植有太中大夫守中書侍郎兼禮部尙書同平章事賜
紫金魚袋崔慎由有通議大夫守中書侍郎兼禮部尙書同
平章事集賢殿大學士賜紫金魚袋鄭朗有朝散大夫守工
部尙書同平章事集賢殿大學士賜紫金魚袋蕭鄴有朝議
大夫守戶部侍郎同平章事判度支賜紫金魚袋劉瑑皆見

任宰相中書侍郎六部尚書又皆三品職事官也而散官未到金紫銀青則非賜不得衣紫唐人之重散官如此

升朝官 京官

宋史選舉志前代朝官自一品以下皆曰常參官其未常參者曰未常參官宋日常參者曰朝官祕書郎以下未常參者曰京官老學庵筆記國初以常參官預朝謁故謂之朝官而未預者曰京官元豐官制行以通直郎以上朝預宴坐仍謂之升朝官而按唐制去京官之名凡條制及吏牘止謂之承務郎以上然俗猶謂之京官案元豐以前祕書省著作佐郎大理寺丞光祿寺丞衛尉寺丞將作監丞大理評事太常寺

太祝奉禮郎祕書省校書郎正字將作監主簿皆京官也元

豐改制以宣教本宣德政和改宣義承事承奉承務郎為京官京官

之下則為選人有七資四等之差崇寧中改選人七階為承直儒林文林從事通仕登

仕將仕郎政和以從政修職迪功易通仕登仕將仕三階其通仕登仕將仕三階係奏補未出身人

前行中行後行 頭司子司

唐宋制六部有前行中行後行三等而廿四司有頭司子司之稱唐會要故事以兵吏及左右司為前行刑戶為中行工禮為後行每行各管四司而以本行名為頭司餘為子司如部為頭司司勳司封考坊為子司五部皆仿此顯慶元年七月二十一日改戶部尚書為度支尚書侍郎亦准此遂以度支為頭司戶部為子司

至龍朔二年二月四日復舊次第

海錄碎事唐制郎官前行爲要後行爲閒南部新書先天中王上客爲御史自以才望清華當入省臺望前行忽除膳部員外郎微有惋悵吏部郎中張敬忠詠曰有意嫌兵部專心望考功誰知腳踏蹬卻落省牆東蓋膳部在省最東北隅也膳部爲後行又在禮部四司之末

吏部七司

唐制六部各置四司宋元豐改官制以後分尙書左右選侍郎左右選各置郎官南渡後遂有尙左尙右侍左侍右之稱皆吏部一司所分也并司勳司封考功是爲七司

尙左尙右侍左侍右

文獻通考宋朝典選之制自分爲四文選二曰審官東院曰流內銓武選二曰審官西院曰三班院元豐定制以審官東院爲尙書左選審官西院爲尙書右選流內銓爲侍郎左選三班院爲侍郎右選舊制吏部除侍郎二員分典左右選總稱吏部侍郎閒命官兼攝惟稱左選侍郎或右選而已紹熙三年謝深甫張叔椿兼攝始有侍左侍郎侍右侍郎之稱既而林大中沈揆擢貳尙書則侍左侍右徑入除目相承不改矣郎中主管尙書左右選侍郎左右選各一員初進擬第云吏部郎官及擬告身細銜始直言吏部尙書郎中或員外郎

主管尙書某選主管侍郎某選紹興閒呂希常以監六部門
兼權侍右郎官李端民正除尙右郎官既而何備楊俊費行
之除吏部郎官皆有侍左侍右尙左尙右之稱自此相承不
改宋史徐霖應懌陳宗禮俱嘗任尙左郎官范鍾王萬高斯
得吳潛李伯玉任尙右郎官曹彥約王邁徐鹿卿楊文仲
陳仲微嘗任侍右郎官而徐清叟孫
夢觀家鉉翁傳皆有侍右侍郎之稱

左右

唐宋左右僕射左右丞相左右丞皆以左爲上元左右丞相
左右丞則以右爲上科場蒙古色目人稱右榜漢人南人稱
左榜亦右爲上也明六部左右侍郎左右都御史左右給事
中左右布政使仍以左爲上

度支支度不同

度支者戶部四司之一唐碑結銜稱度支郎中度支員外郎
者皆郎官也至各道節度使有帶支度營田使者則其屬有
支度判官此外任幕職也宋初沿五代之制以三司使總領
天下財賦三司者卽唐之戶部度支兩司及鹽鐵使也三司
使旣總其要又分置副使判官佐之于是有度支副使度支
判官之名此則三司之屬爲京朝官差遣與外任幕職班秩
不同一稱支度一稱度支其名亦不相混校書者昧于官制
往往率意妄改貽誤非淺

階官分左右

元祐四年十一月三省言承務郎以上至朝請大夫欲分左
右進士加左字餘官加右字從之

此陵志引哲宗舊實錄

紹聖二年四月詔職事官罷帶職朝請大夫以下勿分左右

宋史哲宗紀

揮塵前錄元祐閒范忠宣當國始帶左右攷忠宣以

元祐四年六月罷相而階官分左右乃在是年之冬

則非忠宣所改也

紹興元年九月詔文臣寄祿官依元祐法分左右用樞密院

編修官楊愿請也

毘陵志引繫年錄宋史宰輔表繫於是年十二月

淳熙元年三月詔寄祿官及選人並去左右字

宋史孝宗紀

周必大撰趙善俊神道碑云孝宗屢欲用君因奏進士任子
自分兩途仕州縣者不相下蓋由階帶左右流弊至此頃楊
時嘗論之今華貫清流非進士自不可至豈在二字宜如元
豐官制有旨從之

按元祐階官分左右自承務郎以上則選人無左右
之分也紹興則自承直至迪功皆分左右與元祐亦
不盡同

正議大夫以上分左右

徐度卻埽編舊制諫議大夫積十一轉而至僕射

由諫議一轉給事中

再轉後行侍郎三轉中行侍郎四轉前行侍郎五轉
左右丞六部尚書遞轉蓋十一轉而至吏部尚書也

二府乃七轉 初轉給事中再轉工侍三轉戶侍四轉左右丞五轉禮書六轉戶書七轉吏書 及官制
 行太中大夫 即舊諫議大夫也 七轉至特進 即僕射 而不分庶官與二
 府 自太中一轉通議再轉正議三轉光祿四轉銀青光祿五轉金紫光祿六轉即特進 元祐中始令正
 議光祿銀青光祿金紫光祿並置左右分為二資於是復十
 一轉而至特進紹聖以後因之不改政和中增置通奉正奉
 宣奉三階而罷分左右止十轉至特進而庶官二府並循此
 制蓋祖宗以來二府不磨勘故有優遷紹興新書乃并二府
 有磨勘之法然亦未嘗舉行也
 特進 金紫光祿大夫 銀青光祿大夫 光祿大夫
 宣奉大夫 正奉大夫 正議大夫 通奉大夫 通議

大夫 太中大夫 以上凡十階
 選人七資四等
 畱守節度觀察判官
 節度觀察掌書記 支使 防禦團練判官
 畱守節度觀察推官 軍監判官 以上兩使職官
 防禦團練軍事推官 以上初等職官
 錄事參軍 縣令
 知錄事參軍 知縣令 以上令錄
 軍巡判官 司理 司法 司戶 簿 尉 以上判官簿尉
 判司簿尉七考令錄職官六考有京官舉主五人內一員

轉運使副或提刑並磨勘引見轉合入京朝官宋史職官志

判司簿尉初任循一資入知令錄次任二考以上入正令

錄知令錄循一資入初等職官正令錄入兩使職官初等

職官循一資入兩使職官兩資入支掌防團判官三資入

節察判官同石林燕語云選人寄祿官凡四等七資謂此也

帥漕憲倉

文獻通考言唐之州縣不過一使臨之而宋則有帥漕憲倉四司故州縣之官尤難以奉承展布帥漕憲倉蓋當時案牘之稱帥謂安撫司漕謂轉運司憲謂提點刑獄司倉謂提舉常平司帥憲倉一人而已漕則一路或有兩三人曰轉運使

曰轉運副使曰轉運判官皆漕司也

庾司

提舉常平司宋人謂之倉司亦謂之庾司宋史孫夢觀傳提點廣東刑獄改廣西兼漕庾二司黃當傳知廣州主管廣南東路經略安撫司公事馬步軍都總管領漕庾如故是也漕庾本流俗相稱如今人稱布政按察曰藩臬之類若臣僚除授自當書轉運及提舉常平方合史法宋史於南渡諸臣傳不特敘次無法即所書官名亦鄙俗如此

四總領

紹興十一年收諸帥兵以為御前軍屯駐之所皆置總領一

人以朝臣爲之敘位在轉運副使之上鎮江諸軍錢糧淮東
總領掌之建康池州諸軍錢糧淮西總領掌之鄂州荆南江
州諸軍錢糧湖廣總領掌之興元興州錢糧四川總領掌之
四川總領初稱總領四川宣撫司
錢糧紹興十八年改四川總領
總領財賦所或謂之總所亦稱餉所又謂之餉司鶴山集中
往往有此

十都統

紹興十一年張俊韓世忠岳飛除樞密使副入覲俊首納所
部兵乃分命三大帥副校各統所部自爲一軍更其銜曰統
制御前軍馬鎮江大軍即韓世忠舊部建康大軍即張俊舊

部鄂州大軍即岳飛舊部也并荆南府江州池州皆有御前
軍凡六統制十九年又改漢沔兩大將爲御前諸軍吳璘稱
利州西路駐劄御前諸軍都統制在興楊政稱利州東路都
統制在興金州但以知州兼節制所謂利路三大屯也而興
州之事權特重及吳曦叛後改興州爲沔州又分興州十軍
爲沔利二軍移沔州副都統司於利州沔州除都統制不除
副利州除副都統制不除正天下有十都統矣

直隸

宋制以州領縣而縣亦有不領於州而直隸京師者九域志
利州路有三泉縣唐隸興元府皇朝乾德五年以縣直隸京

師至道二年建為大安軍三年廢軍為縣而縣之直隸京師如故也直隸兩字始見於此寰宇記於西縣三泉縣並一皇朝平蜀後以此縣路當要衝申

奏公事直屬朝廷

三泉今寧羗州地

州院

乾隆戊戌歲瓜洲浚河得南宋官印文曰宿州州院朱記初不解州院為何職後讀羅端良新安志乃知每州有州院與司理院皆刑獄之稱州院則錄事參軍主之司理院則司理參軍主之若州升為府則稱府院會稽志錄事參軍解舍在府治之西南府院在焉司理參軍解舍在府治之南獄在焉

宜差

景定建康志卷首題承直郎宜差充江南東路安撫使司幹辦公事周應合修纂蓋當時諸路帥臣多有奉敕便宜行事者以其未奉朝旨故謂之宜差或讀為宜差者非也金元始有宜差之名志載通判南廳壁記結銜有稱宜差者有稱宜特改差者皆在馬光祖鎮建康日與應合同時予又見慶元五年石刻萬壽山修觀音祠記後題宜差通判軍州兼管內勸農營田事劉震書并篆蓋此又在景定之前石刻分明可無疑矣

宋人建康府通判三人

蓋通判各一員西京南京天雄成德

建康志國朝會要諸州置通判各一員西京南京天雄成德等府各二員江寧府初置一員其後視西京等例增置一員

分東西二廳其後又添差一員以朝士充是為南廳

官名俗省

宋人文集小說稱人官名往往割取兩字蓋流俗相稱之詞如云撫幹者安撫司幹辦公事也運幹者轉運司幹辦公事也提幹者提刑司幹辦公事也總幹者總領所幹辦公事也制機者制置司主管機宜文字也帥機者安撫司主管機宜文字也帥準者安撫司準備差遣也

狀元榜眼

進士第一人稱狀元起於唐至今猶因之予嘗讀周益公省齋文集有回姚狀元穎啟回弟三人葉狀元適啟回弟三人

李狀元寅仲啟又魏了翁鶴鳴集有回蔣狀元重珍蔡狀元

仲龍趙狀元發三啟於蔡則云擢亞倫魁於趙則云名列魁

三又嚴州淳安縣狀元坊二一在儒學以淳祐丁未邑人黃

蛻為大對第二建一在邑東新橋以邑人方逢辰為大對第

一建見新定續志是第二三人皆可稱狀元也南宋坊刻有陸狀

元增節音注精議資治通鑑一書首題會稽陸唐老集注攷

宋時狀元無陸唐老其人蓋亦弟二三人矣宋史陳若拙傳

稱當時以弟二人及第者為榜眼然王元之小畜集有送弟

三人朱巖先輩從事和州詩云榜眼科名釋褐初是第三人

亦稱榜眼也

朱國楨湧幢小品云元時及第第二者亦稱狀元蓋其時第一必蒙古人以中國人居第二故中國自以狀元稱之其餘進士係中國人者亦曰某人榜進士皆第二也諸公多致疑或曰從俗或曰訛殆未之究耳如李黼榜進士黼亦第二也予謂朱說非是元時鄉會及廷試皆分左右二榜蒙古色目人爲右榜漢人南人爲左榜各有狀元未嘗併而爲一如泰定四年賜阿察赤李黼等及第阿察赤左榜第一李黼右榜第一故楊廉夫自稱李黼榜進士黼右榜狀元非第二也今國子監有元至正十一年進士題名碑又嘗見元統元年題名錄皆分左右榜國楨臆說不可信

經義破題

唐人應試詩賦首二句謂之破題韋象畫狗馬難爲功賦其破題曰有一人於此一則矜能於狗馬一則誇妙于鬼神見此賦有破題也裴令公居守東都夜宴半酣公索聯句時公爲破題亦見此詩有破題也宋熙寧中以經義取士雖變五七言之體而士大夫習於排偶文氣雖疎暢其兩兩相對猶如故也偶閱橫浦日新云有一人作健而說義破題云君子有勝小人之道而無勝小人心極佳然則宋時經義已有破題不始於明也宋季有魏天應論學繩尺一書皆當時應舉文字有破題接題小講大講入題原題諸式是論亦有

破題

題目疑難處上請

宋禮部試士知貢舉官下簾幙出示題目中有疑難處聽士人就簾外上請主文於簾中詳荅之

夢梁錄

塗改添注

鄉會試有塗改添注字數之例洪容齋引貽子錄云燭下寫試無誤筆即題其後云並無楷改塗乙注如有即言字數蓋唐宋已有之元史選舉志塗乙注五十字以上者不考

春秋合題

經義唯春秋有合題予嘗見劉青田集載至順癸酉會試春

秋義以荆人來聘楚屈完來盟于師楚人使宜申來獻捷楚子使椒來聘四節合為一題 國朝沿明舊制鄉會試春秋有單題有合題其異於元者元時合題多至五六事今一題祇兩事耳乾隆初始去合題

銓試

吳自牧夢梁錄每歲三月上旬應文武官蔭授子弟宗子蔭補者並赴銓闈就試出官朝廷遣監試主文考試等官就禮部貢院放試試中者三名取一名文臣試兩場本經及刑統義第三日願試法科者聽武臣試七書義三學生員入試中選者陞內舍如省闈年分移于八月放試中榜者赴吏部伺

一
卷之六
金卷一
候簾試過參注差遣武選中者就兵部右選廳銓量注授其
文武銓魁特轉一資恩例銓魁仍置局造題名集設同年宴
于西湖帥運諸司俱有送助以為局費

科舉之弊

魏華父云釋老之患幾於無儒科舉之患幾於無書

杜德稱墓志

又云古者閏月書族時攷州歲比鄉三年而賓興眾賓之席
弗屬堂下之觀禮者弗坐無異詞也今易吏而主其事糊名
而察其言望實之素著或攻而去之文詞之稍異或思而抑
之寧收卑近無拔雋尤其幸而得之則又將以其取於人者

取人矣

眉州朔貢院記

文文肅殿試卷

文文肅公震孟天啟二年殿試卷今藏吳中袁氏後列讀卷
官少師兼太子太師吏部尚書建極殿大學士葉向高少傅
兼太子太傅吏部尚書建極殿大學士韓爌太子太保禮部
尚書兼文淵閣大學士朱國祚太子太保吏部尚書張問達
禮部尚書兼東閣大學士史繼階兵部尚書兼東閣大學士
孫承宗戶部尚書汪應蛟刑部尚書王紀都察院左都御史
鄒元標吏部左侍郎兼翰林院侍讀學士戚以弘禮部右侍
郎兼翰林院侍讀學士協理詹事府事周如磐禮部右侍郎
兼翰林院侍讀學士署掌院事錢象坤兵部左侍郎張經世

詹事府少詹事兼翰林院侍讀學士駱從宇詹事府少詹事
兼翰林院侍讀學士周炳謨詹事府少詹事兼翰林院侍讀
學士魏廣微通政使司左通政袁可立大理寺左寺丞鄭尙
賓凡十有八人皆朱字鈐印卷中太祖成祖神祖列聖字樣
皆不出格讀卷官於文之佳者以紅圈斷句與今式異

鄉試錄

予家有康熙四十一年江南鄉試錄考試官吏部文選司郎
中陳汝弼山東福山人工科給事中黃鼎楫直隸宣化人其
序云先以御史臣朝楠貳之繼命給事中鼎楫來代朝楠未
詳其姓也是科始編官卷江南中式八十三名官卷中者八

人第七名華亭張維煦第十五名崑山徐駿皆官卷也

